

赤山法忍禅师道行录

詹天灵辑

赤山法忍禅师道行录

金陵妙缘精舍印行

赤山法忍大禅师道影



书名 赤山法忍禅师道行录
编者 詹天灵
制作者 周黎明 老铁
出版 金陵妙缘精舍
出版时间 二零一二年八月
开本 三十二开
印数 壹仟册
联系电话 13914709882

(结缘赠送，用广流通，告知奉寄，恭候襄教)

法忍和尚真赞

虚云

道不在丹青，禅不在相貌。
强自摹将来，赞之有何说。
一笑震天涯，一语钦海岳。
七祖一条棒，千僧唯一喝。
豪气动坤维，风光穿碧落。
从不轻视于人，就里有些些快活。
衾枕天地兮自歌自乐，优游三界兮夜摩兜率。
咦！
他年要识真面目，万象森罗活卓卓。

序

昔我佛释迦世尊于灵山会上，以拈花示众，迦叶尊者默契心宗，破颜微笑，遂付正法眼藏。圣圣相继，贤贤相传，自西乾而流于东土，由来久矣。禅门古以法统为慎，诸大宗匠多固操勘验之法，力防滥冒，凡心心相印，确实开悟者，方得印可，授物表信，立为法嗣。久而疏之，冬瓜人情，迭出名山。禅堂之门弗免，法卷可持；混沌之眼未明，灯录可厕。从上诸祖有知，当言之何？今者，各宗道场多普授法卷，以为门庭兴盛；诸方学人均广求传承，好作正宗师范。岂不知衣钵、法卷之传授，系古师之权益，非参悟之旨，今多本末倒置矣。况古之真明眼者，虽得印可，未必传之法卷、列之灯录，岂非大善

知识者哉？

赤山法忍心祖，宗门之砥柱，渡世之慈航，以智慧第一，奉列清末江苏四大尊宿。早年于金山大彻堂中参究向上，但闻得观心慧禅师印可，未闻有法卷之传付。祖于光绪间，止锡金陵句容赤山，创般若寺以安单，筑金刚窟而纳众。每岁举七，条理井然；六时功课，孜孜善诱。祖力行百丈清规，仿终南茅棚之制，倡农禅并重之法，平日命寺僧抬石锄土，挑粪种菜，以劳其筋骨，苦其心志，务在安定学者之身心，不得放逸。设有问西来意者，便与锄头一柄觅生活，大众常于出坡中顿破禅关，豁然开悟。故南北有志禅合求其钳锤，莫不径赴座前，参修头陀苦行，时有谓赴赤山犹赴终南者。若毗卢印魁、兴福月霞、九华智妙、五台化祥、金山融通、鼓山虚云诸大禅师，道范高隆，为各方推重，而今多不知诸师参悟之所自出，犹知

金陵有赤山而弗知赤山有法忍者亦多矣。

江南佛法之盛，高僧辈出，道行颇多，非法祖一人耳。天灵有志述作阐扬，俱未成编，今就法祖一人事迹先行汇录，付诸手民，文虽殊简，心愿颇深。现今大德，在学者若能真诚参悟，见性明心；主席者若能庄严常住，力倡道风，则我佛之慧命、历祖之芳规，断不至区区于法卷之上也！余虽微末，亦深切盼之。

岁次壬辰金陵后学詹天灵谨识于妙缘精舍北窗



赤山法忍大禅师塔铭并序

法忍心公示寂之明年，其弟子觉筏，匍匐走天童，告余曰：『公往与先师同住金山，知其生平甚悉，乞铭其塔。』余自惟不文，曷足以铭师？然大彻堂中，曾眉毛撕结，义所难辞。余不敢铭师者，恐未必传其实也。谨列次什一，以诏来叶。

按师号法忍，讳本心，直隶宣化府蔚州郭氏子。师童年好道，不昧宿因。同治二年，师年十九，投本州岛朝阳寺，礼明月大师得度。月初命师躬亲田牧，不授一经。师力作逾人，少倦，辄遭棒喝，安受之。历六寒暑，无怠一日。自念别老母出家，岂图种田搏饭吃耶？忽于残编中得《般若经》一卷，读之，皆心中所欲言者。及闻僧诵《法华经》，至《学无学



品》，恍然有省。遂潜入都，从西域寺通悟律师受具。贫不能购经，乃以直缀一裘，易得《法华》全部，披读一周，洞见诸佛出世本怀，深入法华三昧。适金山常净和尚自五台回，与师一见，论宗乘，如旧相识。十一年，践常公约，南至金山，见观心慧和尚，观以向上键锤接之，遂蒙印可，如永嘉之曹溪也。

师深自韬晦，结茅终南。常于老虎穴习定，坐数日，如弹指。后为金山、高旻两寺首座，学者咨决心要，所至云从。惟赋性严正，稍见非法，即拂衣去。光绪戊子，过句容赤山，喜其地幽阒，把茅盖头为休歇处。四方衲子，闻风来者，至屋不能容。乃伐木结宇，垒石为墙，领众出坡，俨如百丈，一日不作，一日不食。尝示众云：『诸方浩浩说禅说教，赤山只抬石锄土。』设有问西来意，便与锄一柄觅生活。师古道自处，不顺人情，呵骂罕可其意。盖其时三关四句六步禅之说炽行，师常

曰：『古人三关四句，乃大死大活后，勘验学者，一时方便，岂可认为实法有传授耶！今人业识茫茫，无本可据，不教看死话头，何能敌生死、得正悟？』又言：『末法之世，秃头外道专用邪智穿凿古人言句，盲笈混释，炫卖多闻，无知奉为秘典，此《楞严》所谓「刻人粪为旃檀形」者，断送佛祖慧命，莫此为甚。』其痛心宗教如此。师虽秉拈花之旨，而深契如来一代时教，每禅余，为众讲解大乘要义，彻骨髓；楚北归元寺请师讲《楞严》、《法华》者再。平日机辩纵横，如疾雷闪电，不可捉摸。及诱掖后进，恒谆谆不倦，务使人人因指见月，得意忘诠而后已。尤善《楞伽》唯识诸部。语学者曰：『修行不能掀翻八识窠臼，纵有妙语，皆识神耳。』

三十一年秋，于本山讲《观楞伽笔记》，未几示疾，乃辞众曰：『吾化缘已毕，将长行矣。汝等各宜惟道自爱。吾住此

山十余年，寸草尺木，皆檀越供养十方僧者，汝等勿违吾志。』即以院事付空浩大师，曰：『今以大法累公，宜善住持。』有弟子问师：『此去依止何地？』师曰：『一切无依，惟依般若。』语毕潸然。问师：『既无依，云何下泪？』师曰：『吾忧汝曹不明般若，且不识途径。』次日黎明，右胁吉祥而寂。时光绪乙巳十月十六日辰时也。大众弟子，皆如丧所亲；樵牧之人，亦为陨涕。明年四月，门人奉全身塔于本山。起龕之日，千众围绕，哭声动地。师生于道光甲辰年三月初四日戌时，寂于光绪乙巳年十月十六日辰时，世寿六十有一，僧腊四十有二。比丘弟子觉筏、比丘尼觉光、优婆塞觉海、优婆夷觉理等数十人，皆能恪遵遗教，清修梵行。其平日闻法获益者，固未可胜计也。

忆余于光绪纪元，结夏金山，始识师，师方自终南下山，

惟身随一破衲。丙子，师于西湖龙井依证果老宿过夏，余偕恒念禅人携豆腐餉师，途中遇雨，通身尽湿，师一见喜甚，易以衣履，亲为具馔。饭后汲泉煮茗，坐石上论宗门中事，极生平法喜，余一宿即行，自是与师别三十年矣。及余主席天童，有僧来甬上，师必嘱曰：『天童和尚是我同参，宜往善事之。』余数往来江湖间，每思与师一晤，竟不果，伤哉！谨为师焚香拭泪，铭其塔曰：

郁郁蔚州，峨峨五台。含灵毓异，诞此名缙。
宿因不昧，乘愿再来。福田自种，苦行无疲。
莲花契旨，般若标基。白毡易染，元鉴靡遗。
烟水南询，杖锡孤飞。瓣香浮玉，归心导师。
佛祖之遗，如印印泥。荷衣松食，景戢名驰。
赤山耸翠，滹沱分支。滄风味道，水赴成池。

神通妙用，运水搬柴。随机说法，竖拂拈槌。
慧云流润，智种萌蕙。方期正觉，广度群迷。
我法不造，哲人其萎。真镫寢耀，暗室何依。
人天陨泣，遐迩兴悲。追怀畴曩，贻痛来兹。
良觊难再，善逝宁回。聊铭其塔，以永吾哀。

光绪三十三年七月告香日，天童同学敬安和南敬撰

法忍禅师开示

光绪二十九年于终南山

禅宗悟证，有不同者，有先悟后修，有先修后悟，若依佛祖言教明心者解悟也。如真用工的人，多落知见于一切境界，多不得力，以心境角立，不得混融，触途成滞，多作障碍，纵有玄言妙语，偈诗成片，不得真实受用，仍被名利五欲所转，生死关头，更无把握。此名相似般若，非真参实悟也。若证悟者，从自己心中，朴实做去，逼到山穷水尽之处，忽然一念顿歇，彻了自己心，如十字街头，见亲爷一般，更无可疑，如人饮水，冷暖自知，亦不能吐露向人，此乃真参实悟。然后即以悟处，融会心境，净除观业、流识、妄想、情虑，熔成一

味真心，此证悟也。亦有深浅不同。可以证明，不被名利所牵、五欲所缚，于逆情不动恼，于顺情不起贪爱，一念贯通，可以照彻三世因果，那时松竹影里过，片叶不遮身，证明工夫之深浅也。

见高鹤年《名山游访记补编》

诸家纪载

光绪《续纂句容县志》卷二下：古般若寺在赤山东，光绪十四年僧法忍重建。

谛闲《大方广圆觉修多罗了义经讲义》：善知识有顺行逆化二种，顺行者，语言动作，端端正正，易于辨识；逆行者，往往现出种种尘劳。如从前句容赤山有法忍老人，为宗门善知识，常令参学者搬石运木，稍不如意，立加呵责，即是尘中劳相。然而虽热恼，心本清凉，特借此以试人之有无真诚与否耳。善学者肯耐烦为之作苦，及事毕，此老乃为之说法，则一片清凉，引人入胜，此真善知识也。更有一种示现诸过者，若

聆其说法，则尽力赞叹持戒之梵行。可知其示诸有过，乃是逆化权现。

《虚云和尚年谱》：光绪十一年乙酉，四十六岁，至南五台，晤觉朗、冶开、法忍、体安、法性诸上人，在此结茅庵，留予同住。法忍住老虎窝，冶开居舍龙椿，法性住湘子洞，予与觉朗、体安同住大茅蓬。光绪十六年庚寅，五十一岁，到句容礼法忍和尚，助其修赤山，住此过冬。光绪二十一年乙未，五十六岁，扬州高旻寺住持月朗到九华，称今年高旻有朱施主法事，连旧日四七，共打十二个七，赤山法老人已回寺，仰诸位护持常住，都请回山。将届期，众推予先下山。光绪二十五年己亥，六十岁，七月至句容，赤山法忍和尚付茅蓬，过冬。光绪二十七年辛丑，六十二岁，春夏，予仍居茅蓬。赤山

法老人抵陕，结庵翠微山皇裕寺，来六十余人，半住皇裕寺即唐太宗避暑处，半住兴善寺。时苏军门在北地开水田，将鸭伯滩地百顷送翠微山作僧粮。土人谓世代居此，要将田易地，僧不肯，兴讼，败于理，法老人大受气。次年，老人南返，尽将器物归之体安、月霞，余众四散。每念此事之艰，稍一恃强，终招祸害。此次南僧到北地，受影响不少，而山川形气亦不无关系也。

虚云《悼赤山法老人》：赤山高处竖法幢，群魔匿迹毒龙降。高旻道布三千里，胜侣兼收大小庞。有雁悲鸣来北地，无人继席起南方。可怜一具风雷舌，付与吴江又楚江。

见《虚云和尚全集·诗偈》

戒尘《我与虚云上座》：光绪二十七年秋，法忍老人有赴终南之

举，先命月霞法师去营办道场，余与复成上座随侍月公往终南。适有虚云上座在山结茅自居，因与之相谈禅理，口若悬河，机语不让。

见《关中寐语》

隐峰《金陵毗卢文祖传》：毗卢印魁和尚，燕山易州人也……游江乘赤山，依法忍禅师参向上二宗，朝夕搬柴运水，拽石担土。

见《金陵毗卢寺印魁文祖法语》

智光《月霞法师略传》：月霞珠法师，湖北黄冈人……当时宗匠，金陵有赤山法老人，声振海内，法师遂往亲近，昼则搬石运材，夜则席地围坐，各言其旨。互相发明。一日夜深，法师苦行，为众烧茶，大众环集，法老人问曰：『无字怎么讲？』众皆默然，无一敢应，法老人振威一喝：『烧茶的来！』法师至，即应声曰：『无者，没有

也。』法老人又厉声曰：『没有是什么？』法师答：『水开了，我泡茶奉老人。』由是法老人每遇众不能答之语，必使法师代之。

见《法海波澜》第五期

持松《月霞老法师略传》：先师讳显珠，字月霞……辛丑，因赤山法忍法师欲至终南，师率学人等先往，有军门苏公施田若干亩，师自领众开垦，不辟艰辛。次年，亲迎法公于长安居之，又成大道场焉。次年，法公有事南返，师亦随旋，居赤山。先是师受具之后，一日坐次曰：『永明有言，观音王以前，无师自悟犹可，观音王以后，无师自悟者，乃天然外道。』遂于丁亥至天宁，参冶开禅师。己丑至金山，参大定禅师。又明年，之中州，访少林故迹。回至太白顶，参了尘上座，稍有省，力求进境，致心疾，了公曰：『近有法忍老人，在赤山大开炉鞴，子之悟缘在彼，可往参之。』师即辞往。无几，得幽契，而

心疾乃瘳。于是往来赤山者十余年，尝与松岩师为友，乃松岩师卒，师曰：『失吾宏教左臂矣。』光绪三十一年乙巳，法公寂，师领赤山事。丙午，归葬法公于本山。

见《觉有情半月刊》第六二、六三期合刊

高鹤年《读月霞法师传回忆四十年前事略记》：月霞法师与余同学赤山，《传》内载有光绪廿八年法忍禅师、月霞法师等往终南山办道场一节。盖因大法东来，三千衲子下江南，八百狮子吼秦川，终南山乃发祥地，不应冷落，故有此举。邀余同行，未果，余在南京古林寺度夏，听通智法师讲《楞严》。

见《觉有情半月刊》第七二、七三期合刊

仁山《金山融通和尚传》：融通和尚者，金山方丈也，法讳印

彻，别号范莲，俗姓吕，无锡产也。幼失怙，年十七，复失恃，依舅氏读，训蒙以自养。光绪辛卯，年二十六岁，感身世之梦幻，誓愿出家，投本邑嵩山寺依静修师薙染。壬辰年，诣上海龙华寺受具。又越年癸巳，念生死事大，遍参名宿，如祖印、谛闲、楚泉等，始揖毗陵天宁善净和尚，寻来山参隐儒和尚，时有省发。甲午春，自以未阅大藏，乃于藏经楼阅藏三载。丁酉间，赤山法忍禅师为宗门巨匠，值讲《楞严经》于安徽大通莲华寺，因诣听讲，逮庚子春听毕，随至赤山一心参究，而法公不重文字，直指心要，久觉虚空打破，身心豁然，盖自是性天已洞见矣。

见《仁山法师文集》

罗杰《九华智妙禅师传》：抚九华之背，曰六亩田者，其地幽阒如鸟巢虎穴，清季智妙禅师与度老、清德两法师盖屋休歇，号曰『文

殊茅棚』，已而两法师他往，师坚苦独留，开单接众，以宗教互融、禅净兼修为眼目，历二十余年，遂为有名兰若。师度缘已熟，以民国十三年十月十六日示寂。师名真元，湖北汉阳宋氏子，童年好道，早怀出世之志，累请于父母，不许。年二十八，投随县太白顶保安寺剃度，寻受具足戒……师遂一钵南行，闻金山、高旻宗风特振，遂先后依止二寺禅堂，历十数寒暑，深有悟入。法忍心禅师卓锡赤山，禅席甚盛，师往参，忍公识为法器，恒向上键锤接之，遂蒙印可。忍公门风高峻，呵骂罕可其意，来参学者，日则抬石出坡，夜则长坐习定，俨如百丈禅师『一日不作，一日不食』家法，故一时缙流游其门者多称龙象。师服劳数载，乘暇精研佛乘，力求禅教，如镜互照，由文字般若而达实相般若，返澈本性而后已。光绪二十四年，月霞法师创修九华山翠峰华严道场，师随侍。

见《世界佛教居士林林刊》总三十一期

王建平 《五台山广宗寺化祥妙禅师行状》：考禅师系出五台山显通寺之摩腾宗，上妙下寂，化祥其号也，俗籍四川射红县，姓方氏。其父悬壶于晋之岢岚县而生师，师以家贫之故，成年后随俗垦植于河套，嗣在河曲县之海潮庵供杂务者年余。东游五台山之秘魔岩，值广宗寺之退居僧彼岸公习静其间，师从而出家剃度之，次日，岸公赐引磬一枚，便之东游，时师年二十六岁。次年，受具戒于北京之岫云寺，期会毕，南游于镇江之金山，扬州之高旻等寺，不契。时蔚州之法忍公驻锡于赤山，大倡宗风，声震全国，师从之游，搬柴运石，洞明法要。

见《世界佛教居士林林刊》总第一期

高鹤年《名山游访记》卷三：归元寺，门前放生池，内有五百罗汉堂，法门气象，道德家风，去年被轰，大半损去，至今未修。光

绪三十年，余在此听赤山法忍老人讲《楞严经》。

高鹤年《名山游访记补编》：民十二夏，南京魏梅荪老居士创造慈幼院放生池，约余请师印光大师同往相助，商立法云寺，京中名流，皈依者众，方便说法，大放光明。何老问余：『如何认识印公是高僧？』答：『自幼访道，亲近金山大定，赤山法忍，华山圣公、大霖，天台敏曦、通智二老，诸大善知识，颇多高人，威仪洁净，道气逼人，令人妄念不起，与师相同。』

陶冶公、温兴《玉崧禅师传草稿》：禅师号玉崧，法派曰昌怀，俗姓周，其先世楚南人……初参法忍禅师于金山西堂，有所入。

见《佛学半月刊》第二三六期

应慈《追悼玉崧老法师》：赤山门下，先兄月霞法师为首座头陀，玉崧上座为典座，此二师为法忍老最契心宗，又为『赤山双哲』之称时。

见《佛学半月刊》第二四三期

元音老人《佛法修证心要·略论明心见性》：近代之楚泉禅师，参见赤山法祖。一日，祖问曰：『《法华》开示悟入佛知见，历代祖师各有开示。但皆是各位祖师自己的，非关子事。今欲子从自己胸襟中道将来，如何开示悟入佛知见？』师无语。祖叹曰：『如是参禅，只是徒丧光阴，有何益处？』罚令跪参。连参三枝香，听维那打开静板响，忽然省悟！祖考问曰：『如何开佛知见？』答曰：『开出本有。』进问曰：『如何示？』答曰：『示出本无。』再问曰：『如何悟？』答曰：『悟无有无』

更问曰：『如何人？』答曰：『人出无碍。』

元音老人《佛法修证心要·禅海微澜》：清末，南京赤山法祖系当代临济宗大德，道风远播，龙象咸归，一时知名之士，如月霞、楚泉等均慕名聚集会下随师参究。一日，师上堂示众云：『选佛场开英才现，各自道出真见来。这里是选佛场，锻炼龙象的，不是叫你们来吃闲饭、睡觉、打盹的。今天我要考考你们，看那个是个中豪杰，宗门英才。法华宝经全经的要旨在开示悟入佛知见，其中奥意，历代祖师皆各出手眼，有层层入胜的开示与宣扬，确是如华似锦，美不胜收。大家读了，无不敬仰赞叹，获益非浅。但那是各位祖师的，不是你们自己的。食人家的唾余，住在文字、语句上，于悟道无益。今天我要你们各自从自己胸襟中流露出的说来，看谁具有真知灼

见。』法祖道罢，从签筒中抽出一枝标有名字的竹签点名云：『楚泉扬州高旻寺来果和尚的法祖，你先来说。开，怎么开？』泉无语……继点月霞月霞系常州天宁寺冶开大禅德的法子云：『月霞，你试道看，怎么开示悟人？』月霞不假思索，应声云：『我借楚兄的四句答话用一用。』祖云：『怎么借用？』霞云：『开出本有是理法界，事出本无是事法界，悟无有无乃理事无碍法界，人出无碍系事事无碍法界。』祖大声赞云：『好！比楚泉尤较些子。这里不枉是选佛场，今天一下子选出了两尊佛。』

《宝一老人行实》：宝一老人，讳祥珍，河北省清河县高氏子。生而颖异，相貌堂堂，年七岁时，有相士告曰，若能出家，必证道果。师欣然悦从，遂诣本县郑家集锡福庵祝发，学



习经典，及世间文字。壮年受具，南北参学诸大善知识，如赤山老人等。民国初年，归心净土，诣北京红螺县红螺山资福寺。

见《净土圣贤录》



